

摘藻堂四庫全書薈要

史部

欽定四庫全書薈要卷五千四百八十三

舊五代史卷八十二

宋門下侍郎參知政事監修國史薛居正等撰

晉書第八

少帝紀二

天福八年秋七月丁丑朔京師雨水深三尺辛巳許州  
節度使李從溫來朝進封楚國公壬午以前河陽節度  
使皇甫遇爲右龍武統軍丁亥以宣徽南院使李承福

為同州節度使癸巳改陝州甘棠驛為通津驛避廟諱也甲午正衙命冊皇太后以宰臣李崧充使右散騎常侍李慎儀為副丁酉幸南莊召從駕臣僚習射路左農人各賜布衫麻履八月戊申右衛上將軍楊思權卒贈太傅辛亥分命朝臣一十三人分撥諸州旱苗涇青磁鄴都共奏逃戶凡五千八百九十諸縣令佐以天災民餓攜牌納印者五癸酉以前昭義節度使李從敏為左龍武統軍九月戊寅尊秦國夫人安氏為皇太妃帝所

生母也丁亥追冊故魏國夫人張氏為皇后帝之元妃也丙子以金部郎中知制誥馮玉為檢校尚書右僕射充潁州團練使戊子前潁州團練使田令方追奪在身官爵勒歸私第坐前任耀州日額外配民麥錢納歸私室故也延州奏綏州刺史李彛敏拋棄城郡與弟彛俊等五人將骨肉二百七十口來投當州押送赴闕稱與兄夏州節度使彛殷偶起猜嫌互相攻伐故也辛卯夏州奏差宥州刺史李仁立權知綏州癸巳故絳州刺史

張從訓贈太尉追冊皇后之父也甲午夏州李彝殷奏  
衙內都指揮使拓拔崇斌等五人作亂當時收擒處斬  
訖相次綏州刺史李彝敏擅將兵士直抵城門尋差人  
掩殺彝敏知事不濟與第五人將家南走詔李彝敏潛  
結兇黨顯恣逆謀骨肉之間尚與屠害照臨之內難以  
含容送夏州處斬丙申辛大年莊遂幸侍衛使景延廣  
第延廣進金玉器玩賜延廣玉帶名馬母妻賓佐部曲  
僮僕錫賚咸及之庚子以右諫議大夫邊光範為給事

中以吏部郎中劉知新爲右諫議大夫是月諸州郡括  
借到軍食以籍來上吏民有隱落者並處極法州郡二  
十七蝗餓死者數十萬冬十月戊申制以吳國夫人馮  
氏爲皇后仍令所司擇日備禮冊命庚戌封皇第十一  
妹爲嘉興長公主第十二妹爲永泰長公主是夕五更  
有彗見于東方在角旬日而滅壬子以權知延州軍州  
事前鳳州防禦使杜威爲延州畱後甲寅以國子祭酒  
兼戶部侍郎田敏充弘文館學士判館事以吏部侍郎

張昭遠充史館修撰判館事以給事中司徒誦充集賢  
殿學士判院事西京奏百姓馬知饒殺男吳九不死以  
其侵母食也詔赦之甲子以前延州節度使何建爲涇  
州節度使丙寅以涇州節度使王周爲陝府節度使已  
已以左散騎常侍權知開封府事邊蔚爲工部侍郎依  
前知府事壬申以前兵部侍郎李玘爲吏部侍郎癸酉  
命使攝太尉右僕射平章事和凝使副攝司徒給事中  
邊光範追冊故魏國夫人張氏爲皇后奉寶冊至西莊

影殿行禮鹵簿儀仗如式十一月丁丑以鄧州節度使

宋彥筠爲晉州節度使以涇州節度使何建爲鄧州節

度使己卯以前鄴都留守廣晉尹李德琬爲涇州節度

使丙申所司奏議故天下兵馬都元帥吳越國王錢元

瓘諡曰莊穆詔改爲文穆戊戌遣前復州防禦使吳縯

權知貝州軍事詔節度使王令溫赴闕庚子單州軍事

判官趙岳奏刺史楊承祚初夜開門出城稱爲母病往

青州寧視于孔目官齊琪處留下牌印臣已行用權知



州事辛丑高麗遣使朝貢昭化軍節度使瑞慎等州觀  
祭等使杜建徽進封鄖國公遣侍衛步軍都指揮使郭  
謹領兵赴鄆州十二月乙巳朔遣左領軍衛將軍蔡行  
遇押兵士屯于鄆州仍遣供奉官殿直二十六人自河  
陰至海口分擘地分巡檢以青州節度使楊光遠謀叛  
故也庚戌前左御正齊國夫人吳氏已降二十一人並  
封郡國夫人太后宮皇后宮知客夫人等亦如之太子  
太保致仕梁文矩卒贈太子太傅癸丑詔河陽節度使

符彥卿宋州節度使高行周貝州節度使王令溫同州  
節度使李承福陳州梁漢璋亳州李夢懷州薛懷讓並  
赴闕分命使臣諸州郡巡檢以契丹入寇故也遣給事  
中邊光範前登州刺史郭彥威使于契丹行至恒州敵  
已犯境不能進留于公館數月不達其命而回

遼史天  
福八年

二月乙卯晉遣使進先帝遺物辛酉晉遣使請居汴從  
之三月丁未晉主至汴遣使來謝五月己亥遣使如晉  
致生辰禮六月辛酉晉遣使貢金秋八月丁未朔  
晉復貢金己未如奉聖州晉遣其子延煦來朝

甲寅

以單州刺史楊承祚為登州刺史從其便也華州陝府

奏逃戶凡一萬二千三百乙丑臘車駕不出詔前陝州  
節度使石贊率諸節度使畋于近郊太子賓客聶延祚  
卒丁卯詔宣徽使劉繼勳就杜威園亭會節度使統軍  
等習射淄州奏青州節度使楊光遠反遣兵士取淄州  
劫刺史翟進宗入青州是冬大飢河南諸州餓死者二  
萬六千餘口

開運元年春正月甲戌朔是夕陣雲掩北斗之魁星乙  
亥滄恒貝鄴馳告契丹前鋒趙延壽趙延昭引五萬騎

入寇將及甘陵青州楊光遠召之也已卯契丹陷貝州  
知州吳巒死之庚辰以宋州節度使高行周為北面行  
營都部署以河陽節度使符彥卿為馬軍左廂排陣使  
以右神武統軍皇甫遇為馬軍右廂排陣使以陝州節  
度使王周為步軍左廂排陣使以左羽林統軍潘瓌為  
步軍右廂排陣使太原奏契丹入鴈門圍忻代二州恒  
滄邢三州上言契丹大至是歲天下餓死者數十萬人  
詔逐處長吏瘞之壬午詔取此月十三日車駕北征以

前邠州節度使李周為權東京留守乙酉車駕發東京  
丁亥敵騎至黎陽以侍衛馬軍都指揮使李守貞為前  
軍都虞候河北危蹙諸州求救者人使相望戊子車駕  
至澶州以貝州節度使王令溫為鄆州節度使時令溫  
弟令崇自契丹至訴以舉族陷于甘陵故有是命辛卯  
鄆都留守張從恩遣人夜縋城間行奏契丹主以鐵騎  
三四萬建牙帳于元城以趙延壽為魏博節度使改封  
魏王延壽日率騎軍摩壘而退甲午以北京留守劉知

遠爲幽州道行營招討使以恒州節度使杜威副之定

州節度使馬全節爲都虞候其職員將校委招討使便  
宜署置乙未大霧中有白虹相偶占者曰斯爲海淫其  
下必將有戰詔率天下公私之馬以資騎軍丙申契丹  
攻黎陽遣右武衛上將軍張彥澤等率勁騎三千以禦  
之己亥遣譯語官孟守忠致書于契丹主求修舊好守忠  
自敵帳迴契丹主復書曰已成之勢不可改也辛丑太  
原奏與契丹戰于秀谷斬首三千級生擒五百人獲敵

將一十七人賊軍散入鷓鴣谷已進軍追襲二月甲辰朔遣石贇守麻家口何建守楊劉鎮白再榮守馬家渡安彥威守河陽鄆州奏博州刺史周儒以城降契丹又與楊光遠潛約引契丹于馬家渡濟河時郭謹在汶陽遣左武衛將軍蔡行遇率數百騎赴之遇伏兵于葭葦中突然而出轉鬪數合部下皆遁行遇為賊所執鋒鏑重傷不能乘馬坐轡中舁至幕帳遣李守貞等水陸進兵而下以救汶陽丙午先鋒指揮使石公霸與契丹遇

于戚城之北為契丹所圍高行周符彥卿方息于林下  
聞賊至駭愕督軍而進契丹衆甚盛被圍數重遣人馳  
告景延廣請益師延廣遲留候帝進止行周等大譟瞋  
目奮擊賊衆傷死者甚多帝自御親兵救之方解

宋史符彥

卿傳契丹騎兵數萬圍高行周于鐵邱諸將莫敢當其  
鋒彥卿獨引數百騎擊之遼人遁去行周得免高懷德  
傳至戚城被圍數重援兵不至危甚懷德  
左右射縱橫馳突衆皆披靡挾父而出

登戚城古臺

置酒以勞三將咸咎延廣不遣兵赴難相對泣下戊申  
契丹築壘于馬家渡東岸以騎軍列于外以禦王師李



守貞以師搏之遂破其衆賊騎散走赴河溺死者數千  
遂拔其壘初西岸敵軍數萬鼓譟揚旗以助其勢及見  
東岸兵敗號哭而去獲馬八百匹生擒賊將七十八人  
部衆五百人送行在悉斬之辛亥夏州節度使李彝殷  
合蕃漢之兵四萬抵麟州濟河侵契丹之境以牽脅之  
壬子以彝殷為契丹西南面招討使易州刺史安審約  
奏戰契丹于北平賊退保和溝闕斷其橋梁而還癸丑  
博州殘兵至自賊中周儒之降也賊執其軍士將獻于

幕帳行次中途守者夜寢其中軍士一人自解桎梏爲  
諸兵釋縛取賊戈矛盡殺援者二百餘人南走而歸至  
河無舟浮水而過溺死之餘所存者六十七人是日日  
有黃白暈二白虹夾日而行己未滄州奏賊衆三千人  
援送所掠人口寶貨等由長蘆入蕃以輕騎邀之斬獲  
千餘人人口輜重悉委之而走庚申宰臣馮道等再上  
表請聽樂皆不允時帝自期年之後于宮中間舉細聲  
女樂及親征以來日于左右召淺蕃軍校奏三絃胡琴

和以羌笛擊節鳴鼓更舞迭歌以為娛樂常謂侍臣曰  
此非音樂也故馮道等奏請舉樂詔旨未允而止壬戌  
楊光遠率兵圍棣州刺史李瓊以州兵擊之棄營而遁  
冀州奏敗賊軍于城下見昇棺者訊其降者曰戚城之  
戰上將金頭王中流矢而死此其櫬也癸亥以前鄧州  
節度使何建為東南面馬步軍都部署率師屯汶陽甲  
子蜀人寇我階州三月癸酉朔契丹主領兵十餘萬來  
戰時契丹偽棄元城寨已旬日矣伏精騎于預邱故城

以待王師

通鑑鄴都留守張從恩屢奏敵已遁去大軍欲進追之會霖雨而止

設伏累日

人馬饑頓趙延壽謀曰晉軍悉在河上畏我鋒銳不敢前進不如逕造城下四面而進攻奪其橋梁天下定矣契丹主然之是日前軍高行周在戚城之南賊將趙延壽趙延昭以數萬騎出王師之西契丹主自擁精騎出王師之東兩軍接戰交相勝負至晡時契丹主以勁兵中央出而來帝親御軍列為後陣東西濟河為偃月之勢旗幟鮮盛士馬嚴整契丹主望之謂左右曰楊光遠

言晉兵兵馬半已餓死今日觀之何其壯耶敵騎往來  
馳突王師植立不動萬弩齊發飛矢蔽空賊軍稍却會  
有亡者告契丹主曰南軍東面人少沿河城柵不固可  
以攻之契丹乃率精騎以攻東邊王師敗走敵騎追之  
時有夾馬軍士千餘人在堤間治水寨旗幟之末出于  
堰埭敵望見之以為伏兵所起追騎乃止久之復戰王  
師又退李守超以數百騎短兵直進擊之敵稍却戰場  
之地人馬死者無算斷箭殘鏃橫厚數寸遇夜賊擊鉦

抽軍而退夜行三十里而舍焉護聖指揮使協霸

協霸二字

上疑有脫文

亡入賊中夷其族護聖第二軍都指揮使安重

懷指揮使烏韓七監軍何彥超等臨陣畏怯手失兵仗

悉斬之乙亥契丹主帳內小校竊其主所乘馬來奔云

契丹已傳木書收軍北去

契丹國志云景延廣疑有詐閉壁不敢追遼帝北歸所過

焚掠民物殆盡

齊州奏青州賊軍寇明水鎮壬午禮部尚書盧

詹卒贈太子少保甲申契丹車帳已過貝州以趙延昭

守貝州

遼史三月壬午雷趙延昭守貝州從所俘戶于內地

辛卯定州馬全節攻

秦州拔之俘其兵士二千人雜畜戎仗稱是癸巳北京  
留守兼中書令劉知遠封太原王餘如故是日詔天下  
抽點鄉兵凡七戶出一士六戶資之仍自具兵仗以武  
定為軍號太常丞王緒棄市緒家于青州常致書于楊  
光遠緒有妾之兄慊緒不為賙給遂告與光遠連謀密  
書述朝廷機事遂收捕斬之夏四月車駕在澶州滄洲  
奏契丹陷德州刺史尹居璠為敵所執甲辰鄴都留守  
張從恩來朝丁未加從恩平章事還鄴己酉詔取今月

八日車駕還京令高行周王周留鎮澶淵近地兵馬委便宜制置甲寅至自澶州曲赦京城大辟以下罪人丁巳升冀州為防禦使額同華奏人民相食己未以右武衛上將軍張彥澤為右神武統軍辛酉以鄆州節度使侍衛親軍都指揮使景延廣為西京留守以宋州節度使高行周為侍衛親軍都指揮使以侍衛親軍都虞候義成軍節度使李守貞為兗州節度使典軍如故是日分命文武臣寮三十六人往諸道州府括率錢帛以次軍



門癸亥以西京畱守安彥威為晉昌軍節度使以晉昌  
軍節度使趙瑩為華州節度使以左龍武統軍皇甫遇  
為滑州節度使是日置酒宮中名景延廣謂之曰卿有  
佐命之功命保釐伊洛非酬勲之地也因解御衣寶帶  
以賜之丙寅隴州奏餓死者五萬六千口五月壬申朔  
太原劉知遠奏邊境未寧軍用甚廣所封王爵乞未行  
冊命戊寅遣侍衛親軍都虞候李守貞率步騎二萬討  
楊光遠于青州丁亥以鄴都留守張從恩為貝州行營

都部署

通鑑張從恩上言趙延昭雖據貝州麾下兵皆久客思歸宜速進軍攻詔以從恩為貝州行營

都部署

以滑州節度使皇甫遇為行營都虞候以左神武

統軍潘瓌掌騎兵右神武統軍張彥澤掌步兵辛卯張

從恩奏貝州賊將趙延昭縱火大掠棄城而遁

通鑑延昭屯于

瀛莫阻水自固

以李守貞為青州行營都部署以河陽節度使

符彥卿副之戊戌以鄧州節度使何建為貝州永清軍

節度使是月澤潞上言餓死者凡五千餘人六月辛丑

朔王師拔淄州斬楊光遠偽署刺史劉翰辛卯以太尉

兼侍中馮道為檢校太師兼侍中充同州節度使丙午  
詔復置樞密院丁未以侍中桑維翰為中書令充樞密  
使權開封府尹李周卒輟朝贈太師辛亥以邢州節度

使安叔千為晉州節度使加同平章事以晉州節度使宋  
彥均為陝州節度使以吏部郎中李穀充樞密直學士

丙辰滑州河決漂注曹單濮鄆等州之境環梁山合于

汶濟

宋史楊昭儉傳河決數郡大發丁夫以本部帥董  
其役既而塞之晉少主書詔立碑記其事昭儉表

諫曰刺下刺石紀功不若降哀痛之詔檇翰頌美不  
若頌罪己之文言甚切至少主嗟賞之卒罷其事

戊

午升府州為圍練使額庚申襄州獻白鵲甲子復置翰林學士乙丑宰臣等三上表請聽樂詔允之戊辰以門下侍郎王松為左丞以右丞王易簡為吏部侍郎以右散騎常侍蕭愿為秘書監以右諫議大夫王仁裕為給事中以給事中李式為左散騎常侍以金部郎中知制誥徐台符為翰林學士以禮部郎中李濟本官知制誥充翰林學士以刑部郎中劉溫叟改都官郎中充翰林學士以主客員外郎范質充翰林學士御史張宜改倉

部員外郎知制誥庚午以前晉州節度使周密為左龍  
武統軍以同州節度使李懷忠為左羽林統軍

舊五代史卷八十二

舊五代史卷八十二攷證

晉少帝紀二以青州節度史楊光遠謀叛故也。○案楊光遠及五代春秋作十一月與是書作十二月異。歐楊史從是書。

乙亥滄恒貝鄴馳告契丹前鋒趙延壽趙延昭引五萬騎入寇將及甘陵。○案歐陽史作甲戌朔契丹寇滄州。据遼史云甲戌朔趙延壽延昭率前鋒五萬騎次任邱與歐陽史合。

太原奏契丹入雁門圍忻代二州。案通鑑契丹入鴈門不書日遼史作丙子入鴈門圍忻代

乙酉車駕發東京丁亥敵騎至黎陽。案歐陽史作丙戌契丹寇黎陽

辛卯鄴都留守張從恩遣人夜縋城間行奏契丹主以鐵騎三四萬建牙帳于元城以趙延壽為魏博節度使改封魏王。案遼史己丑次元城授延壽魏博節度使使封魏王率所部屯南樂蓋遼人屯于元城自在

己丑晉人至辛卯始得奏聞也歐陽史作辛卯契丹  
屯于元城趙延壽寇南樂殊誤

己亥遣譯語官孟守忠致書于契丹主求修舊好○案  
遼史云辛丑晉遣使來修舊好詔割河北諸州及遣  
桑維翰景延廣來議與是書微異

鄆州奏博州刺史周儒以城降契丹○案博州刺史周  
儒降于契丹歐陽史通鑑契丹國志俱作正月是書  
及遼史作二月



舊五代史卷八十二 攷證

欽定四庫全書薈要卷五千四百八十四

舊五代史卷八十三

宋門下侍郎參知政事監修國史薛居正等撰

晉書第九

少帝紀三

開運元年秋七月辛未朔帝御崇元殿大赦天下改天  
福九年為開運元年河北諸州曾經契丹蹂踐處與免  
今年秋稅諸軍將士等第各賜優給諸州率借錢帛赦

書到日晝時罷徵出一千貫已上者與免科徭一萬貫已上者與授本州上佐云是日宣赦未畢會大雷雨忽遽而罷時都下震死者數百人明德門內震落石龍之首識者以為石乃國姓蓋不祥之甚也癸酉以定州節度使馬全節為鄴都畱守加兼侍中以昭義節度使安審暉為邢州節度使加檢校太師乙亥前陝州節度使王周加檢校太尉改定州節度使鄴都畱守張從恩改鄴州節度使禮官奏天子三年喪畢祫享于太廟高祖

聖文章武明德孝皇帝今年八月喪終畢合以十月行  
大祫之禮冬季祠祭改薦為祫從之丁丑虞部員外郎  
知制誥陶穀改倉部郎中知制誥大理卿吳德謙改祕  
書監致仕辛巳以左龍武統軍李從敏為潞州節度使  
天策府都護軍桂州節度使知朗州軍事馬希杲加檢  
校太師壬午降金州為防禦州降萊州為刺史州戶部  
侍郎田敏改兵部侍郎刑部侍郎李祥改尚書右丞以  
潁州團練使馮玉為戶部侍郎充端明殿學士中書舍

人趙上交改刑部侍郎己丑以樞密使中書令桑維翰  
充弘文館大學士太子太傅譙國公劉昫為守司空兼  
門下侍郎平章事監修國史判三司宰臣李崧和凝進  
封爵邑庚寅宣徽北院使劉繼勳改宣徽南院使三司  
使董遇改宣徽北院使辛卯以前陝州節度使石贊為  
鄧州節度使同州節度使李承福卒贈太傅八月辛丑  
命十五將以禦契丹

東都事畧范質傳契丹入寇晉出  
帝命十五將出征是夕質宿直出

帝命諸學士分草制質曰宮  
城已閉慮泄機事遂獨為之北京留守劉知遠充北面

行營都統鎮州節度使杜威充北面行營都招討使鄆州

節度使張從恩充馬步軍都監西京留守景延廣充馬步

軍都排陣使徐州節度使趙在禮充馬步軍都虞候晉州

節度使安叔千充馬步軍左廂排陣使前兗州節度使安

審信充馬步軍右廂排陣使河中節度使安審琦充馬步

軍都指揮使河陽節度使符彥卿充馬軍左廂都指揮使

滑州節度使皇甫遇充馬軍右廂都指揮使右神武統軍

張彥澤充馬軍排陣使滄州節度使王廷允充步軍左廂

都指揮使陝州節度使宋彥筠充步軍右廂都指揮使前  
金州節度使田武充步軍左廂排陣使左神武統軍潘瓌  
充步軍右廂排陣使壬寅閩王王延義為其下連重遇朱  
文進所害衆推文進知留後事稱天福年號問道以聞甲  
辰太子少傅盧文紀改太子大傅太子少保李麟改太子  
太保刑部尚書李懌改戶部尚書給事中司徒詔改右散  
騎常侍以府州刺史折從阮為安北都護充振武節度  
使是夜熒惑入南斗乙未詔復置明經童子二科己酉

以鄧州節度使王令溫為延州節度使癸丑以威武軍  
兵馬留後權知閩國事朱文進為檢校太傅福州威武  
軍節度使知閩國事癸亥升澶州為節鎮以寧為軍額  
割濮州為屬郡甲子以延州節度使史威為澶州節度  
使九月庚午朔日有蝕之乙酉以戶部侍郎韋勲為太  
子賓客以前隸州刺史段希堯為戶部侍郎以光祿卿  
張仁愿為大理卿己丑禮部侍郎符蒙卒壬辰太原奏  
代州刺史白文珂破契丹于七里峯斬首千餘級生擒



將校七十餘人癸巳以前隴州防禦使翟光鄴為宣徽  
北院使己亥以滄州節度使王廷肩卒輟朝贈中書令  
冬十月壬寅兩浙節度使吳越國王錢弘佐加守太尉  
庚戌以徐州節度使北面行營馬步都虞候趙在禮為  
北面行營副都統鄴都留守馬全節為北面行營副招  
討使甲寅以起居郎知制誥賈緯為戶部郎中知制誥  
戊午詔曰朕處承顧命獲嗣丕基常懼顛危不克負荷  
宵分日昃罔敢遑寧夕惕晨興每懷祗畏但以恩信未

著德教未敷理道不明咎徵斯至向者頻年災沴稼穡  
不登萬姓饑荒道殣相望上天垂譴涼德所招仍屬干  
戈尚興邊陲多事倉廩不足則輟人之饌食帑藏不足  
則率人之資財兵士不足則取人之丁中戰騎不足則  
假人之乘馬雖事不獲已而理將若何訪聞差去使臣  
殊垂體認不能敦于勉諭而乃臨以威刑自有所聞益  
深愧悼旋屬守臣叛命敵騎入邊致使甲兵不暇休息  
軍旅有征戰之苦人民有飛輓之勞疲瘵未蘇科徭尚

急言念于茲寢食何安得不省過興懷側身罪已載深  
減損思召和平所宜去無用之資罷不急之務棄華取  
實惜費省功一則符先帝慈儉之規慕前王樸素之德  
向者造作軍器破用稍多但取堅剛不須華楚今後作  
坊製器械不得更用金銀裝飾比于遊畋素非所好凡  
諸服御尤欲去奢應天下府州不得以珍寶玩好及鷹  
犬為貢在昔聖帝明君無非惡衣菲食況于薄德所合  
恭行今後太官尚膳減去多品衣服帷帳務去華飾在

禦寒溫而已峻宇雕牆昔人所誡玉杯象箸前代攸非  
今後凡有營繕之處丹堊雕鏤不得過度宮闈之內有  
非理費用一切禁止於戲繼聖承祧握樞臨極昧于至  
道若履春冰屬以天災流行國步多梗因時致懼引咎  
推誠期于將來庶幾有補更賴王公將相貴戚豪宗各  
啟乃心率由茲道共臻富庶以致康寧凡百臣寮宜體  
朕意十一月壬申詔曰蕃寇未平邊陲多事即日雖無  
侵軼亦須廣設隄防朕將親率虎貔躬擐甲冑候聞南

牧即便北征不須先定日辰別行告諭所有供億宜令  
三司預行計度合隨從諸司職員並宜常備行計云已  
卯以陳州刺史梁漢璋充侍衛馬軍都指揮使壬午以  
貝州節度使何建為澶州節度使兼北面行營馬軍右  
廂排陣使以澶州節度使史威為貝州節度使丙戌以  
前金州節度使田武為滄州節度使兼北面行營步軍  
右廂都指揮使以前相州節度使郭謹為鄆州節度使  
十二月己亥朔辛臯門射中白兔癸丑福州節度使朱

文進加同平章事封閩國王丁巳青州楊光遠降光遠  
子承勲等斬觀察判官丘濤牙將白延祚楊贍杜延壽  
等首級送于招討使李守貞乃縱火大譟刼其父處于  
私第以城納款遣即墨縣令王德柔貢表待罪楊光遠  
亦遣節度判官楊麟奉表請死詔釋之閏月庚午以楊  
承信為右羽林將軍承祚為右驍騎衛將軍皆光遠之  
子先詣闕請罪故特授是官癸酉李守貞奏楊光遠卒  
初光遠既上表送降帝以光遠頃歲太原歸命欲曲全

之議者曰豈有反狀滔天而赦之也乃命守貞便宜處  
置守貞遣人拉殺之以病卒聞乙酉前登州刺史張萬  
迪削奪官爵處斬青州節度判官楊麟配流威州掌書  
記任邈配流原州支使徐晏配流武州縱逢恩赦不在  
放還之限並以楊光遠叛故也工部尚書權知貢舉竇  
貞固奏試進士諸科舉人入策舊例夜試以三條燭盡  
為限天成二年改令晝試今欲依舊夜試從之曲赦青  
州管內罪人立功將士各賜優給青州吏民為楊光遠

註誤者一切不問青州行營招討使兗州節度使兼侍  
衛都虞候李守貞加同平章事副招討使河陽節度使  
符彥卿改許州節度使丙戌降青州為防禦使額以萊  
州刺史楊承勲為汝州防禦使己丑以工部尚書竇貞  
固為禮部尚書太常卿王延為工部尚書左丞王松為  
太常卿以前尚書右丞龍敏為尚書左丞癸巳以前安  
州防禦使李建業為河陽兵馬留後以宣徽使翟光鄴  
為青州防禦使以內客省使李彥韜為宣徽北院使甲



午以給事中邊光範為左散騎常侍以樞密直學士吏部郎中李穀為給事中依前充職是月契丹耶律德光與趙延壽領全軍入寇圍恒州分兵陷鼓城橐城元氏高邑昭慶寧晉蒲澤樂城栢鄉等縣前鋒至邢州河北諸州告急詔張從恩馬全節安審琦率師屯邢州趙在禮屯鄴都

開運二年春正月戊戌朔帝不受朝賀不豫故也已亥張從恩部領兵士自邢州退至相州人情震恐趙在禮

還屯澶州馬全節歸鄴都遣右神武統軍張彥澤屯黎陽詔西京留守景延廣將兵守胡梁渡契丹寇邢州侍衛馬軍都指揮使梁漢璋改鄭州防禦使典軍如故以齊州防禦使劉在明為相州留後癸卯以客省使孟承誨為內客省使滑州奏今月二日至四日相州路烽火不至甲辰以前汝州防禦使宋光鄴為左驍衛大將軍詔青州行營將校自副兵馬使以上各賜功臣名號乙巳帝復常膳以左威衛上將軍袁義為客省使上將軍

如故詔滑州節度使皇甫遇率兵赴邢州馬全節赴相  
州契丹寇洺磁犯鄴都西北界所在告急壬子王師與  
契丹相拒于相州北安陽河上皇甫遇慕容彥超率前  
鋒與敵騎戰于榆林店遇馬中流矢僅而獲免

遼史皇甫遇與

濮州刺史慕容彥超將兵千騎來覘遼軍至鄴都遇遼  
軍數萬且戰且却至榆林店遼軍繼至遇與彥超力戰  
百餘合遇馬斃步戰安審琦  
引騎兵踰水以救遼軍乃還是夜張從恩引軍退保黎

陽惟留五百人守安陽河橋既而知州符彥倫與軍校  
謀曰此夜紛紜人無固志五百疲兵安能守橋即抽入

相州嬰城為備至曙賊軍萬餘騎已陣于安陽河北彥  
倫令城上揚旗鼓譟賊不之測至辰時渡河而南悉陳  
甲騎于城下如攻城之狀彥倫曰此敵將走矣乃出甲  
士五百于城北張弓弩以待之契丹果引去當皇甫遇  
榆林戰時至晚敵衆自相驚曰晉軍悉至矣戎王在邯  
鄲聞之即時北遁官軍亦南保黎陽甲寅以河陽留後  
李建崇為邢州留後以鳳州防禦使原本下有闕文為河陽留  
後詔李守貞領兵屯滑州以宣徽北院使李彥韜權侍

衛馬步都虞候改諸道武定軍為天威軍己未以前許  
州節度使李從溫為北面行營都招撫使以鄆州節度  
使張從恩權東京留守辛酉相州奏契丹抽退其鄉村  
避寇百姓已發遣各歸本家營種初帝以不豫初平未  
任親御軍旅既而張從恩馬全節相次奏賊軍充斥恒  
州杜威告事勢危急帝曰此賊未平固難安寢當悉衆  
一戰以救朔方生靈若晏安遲疑則大河以北淪為寇  
壤矣即日命諸將點閱以定行計辛酉下詔親征誅楊

光遠部下指揮使張迥等五人以戎事方興慮其扇搖故也癸亥以樞密直學士李穀為三司副使判留司三司公事乙丑車駕發離京師是月京城北壕春冰之上有文若大樹花葉凡數十株宛若圖畫觀者如堵二月戊辰朔車駕次滑州己巳渡浮橋幸黎陽勞軍至晚復還滑州以滄州節度使田武克東北面行營都部署甲戌幸澶州以景延廣為隨駕馬步軍都鈐轄丙子大閱諸軍于戚城帝親臨之戊寅北面行營副招討使馬全節

行營都監李守貞右神武統軍張彥澤等以前軍先發  
己卯以許州節度使符彥卿為北面行營馬軍都指揮  
使以左神武統軍潘環為北面行營步軍都指揮使辛  
巳幸楊村故壘符彥卿皇甫遇李殷率諸軍進發以左  
散騎常侍邊光範為樞密直學士詔河北諸州應蕃寇  
經由之地吏民遭殺害者委所在收瘞量事祭奠詔恒  
州杜威與馬全節等會合進軍丙戌幸鐵丘閱馬因幸  
趙在禮李從溫軍是日大雪戊子安審琦梁漢璋領兵

北征府州防禦使折從阮奏部領兵士攻圍契丹勝州  
降之見進兵趨朔州甲午以河中節度使安審琦為北  
面行營馬步軍都虞候許州節度使符彥卿充馬步軍  
左廂都指揮使滑州節度使皇甫遇充馬步軍右廂都  
指揮使侍衛馬軍都指揮使梁漢璋充馬軍左右廂都  
指揮使侍衛步軍都指揮使李殷充步軍左右廂都指  
揮使左神武統軍張彥澤充馬軍左右廂都排陣使右  
神武統軍潘瓌充步軍左右廂都排陣使丙申以端明



殿學士尚書戶部侍郎馮玉為戶部尚書充樞密使三月戊戌契丹陷祁州刺史沈斌死之乙巳左補闕袁範先陷契丹自賊中逃歸杜威奏與李守貞馬全節安審琦皇甫遇部領大軍赴定州易州刺史安審約奏二月三日夜差壯丁斫敵營殺賊千餘人是日以符彥卿為北面行營馬步軍左右廂都排陣使以皇甫遇為北面行營馬步軍左廂排陣使以王周為馬步軍右廂排陣使丁未畋于戚城還幸景延廣安審信軍庚戌王師攻

泰州刺史晉庭謙以城降易州奏郎山寨將孫方簡破契丹千餘人斬蕃將嘉里相公擄其妻以獻甲寅杜威奏收復滿城獲契丹首領默埒相公并蕃漢兵士二千  
人以前戶部尚書李憚為兵部尚書乙卯杜威奏收復遂城丙辰奏大軍自遂城却退至滿城時賊將趙延壽部曲來降言契丹主昨至古北口幽州走報漢軍大下收却泰州尋下令諸部令輜重入塞輕騎却迴戎王率五萬餘騎來勢極盛明日前鋒必至請為之備杜威李

守貞謀曰我師糧運不繼深入賊疆而逢大敵亡之道也不如退還泰州觀其兵勢強弱而禦之軍士皆以為然是日還滿城丁巳至泰州戊午契丹前鋒已至己未大軍發泰州而南契丹踵其後是日次陽城庚申賊騎如墻而來我步軍方為陣以禦之選勁騎擊賊鬪二十餘合南行十餘里賊勢稍却渡白溝而去辛酉杜威召諸議將曰戎首自來實為勍敵若不血戰吾輩何以求免諸將然之是日敵騎還遼官軍相去數里明日我軍

成列而行蕃漢轉鬪殺聲震地纔行十餘里軍中人馬  
飢乏癸亥大軍至白團衛村下營人馬俱渴營中掘井  
及水輒壞兵士取其泥絞汁而飲敵衆圍繞漸束其營  
宋史藥元福傳晉師列方陣設拒馬  
為行砦契丹以奇兵出陣後斷糧道是日東北風猛揚

塵折樹契丹主坐軍中謂衆曰漢軍盡來祇有此耳今  
日並可生擒然後平定天下令下馬拔鹿角飛矢雨集  
軍士大呼曰招討使何不用軍而令士卒虛死諸將咸  
欲擊之杜威曰俟風勢稍慢觀其進退守貞曰此風助

我也彼衆我寡黑風之內莫測多少若俟風止我輩無

噍類矣即呼衆軍齊力擊賊張彥澤符彥卿皇甫遇等

率騎奮擊風勢尤猛沙塵如夜敵遂大敗

宋史符彥卿傳時晉師居

下風將戰弓弩莫施彥卿謂張彥澤皇甫遇曰與其束手就擒曷若死戰然未必死彥澤然之遂潛兵尾其後

順風擊之契丹大敗又藥元福傳守貞與元福謀曰軍中飢渴已甚若俟風反出戰吾屬為擄矣彼謂我不能

逆風以戰宜出其不意以擊之此兵家之奇也元福乃率麾下開拒馬出戰諸將繼至契丹大敗

時步騎齊進追襲二十餘里至陽城東賊軍稍稍成列

我騎復擊之乃渡河而去守貞曰今日危急極矣幸諸

君奮命吾事獲濟兩日以來人馬渴乏今喫水之後脚  
重難行速宜收軍定州保全而還上策也由是諸將整  
衆而還是時契丹主坐車中及敗走車行十餘里追兵  
既急獲一橐駝乘之而走乙丑杜威等大軍自定州班  
師入恒州夏四月丙子以車駕將還京差官往西京告  
天地宗廟社稷辛巳駕發澶州甲申至京師曲赦在京  
禁囚丁亥詔鄴都依舊為天雄軍庚寅河東節度使劉  
知遠封北平王恒州節度使杜威加守太傅徐州趙在

禮移鎮兗州宋州節度使加侍衛親軍馬步都指揮使  
高行周移鎮鄆州侍衛如故鄴都留守馬全節改天雄  
軍節度使兗州節度使兼侍衛都虞候李守貞移鎮宋  
州加檢校太師兼侍衛親軍副指揮使河中節度使安  
審琦加兼侍中移鎮許州許州節度使符彥卿加同平  
章事移鎮徐州滑州節度使皇甫遇加同平章事壬辰  
西京留守景延廣加邑封改功臣秦州節度使侯益移  
鎮河中定州節度使王周加檢校太師





舊五代史卷八十三

舊五代史卷八十三攷證

晉少帝紀三八月辛丑命十五將以禦契丹。案東都事畧亦載出帝命十五將出征事。歐陽史云劉知遠為北面行營都統杜威為都招討使蓋畧之也。

壬辰太原奏代州刺史白文珂破契丹于七里烽。案通鑑作丙子契丹寇遂城樂壽深州刺史康彥進擊却之與是書異。歐陽史契丹國志並與是書同。

圍恒州分兵陷鼓城橐城元氏高邑昭慶寧晉蒲澤樂

城栢鄉等縣。案遼史己卯圍恒州下其九縣歐陽史繫于乙酉之後疑誤

易州奏郎山寨將孫方簡破契丹千餘人。案孫方簡歐陽史作孫方諫


賊勢稍却渡白溝而去。案通鑑庚申契丹大至晉軍與戰逐北十餘里契丹踰白溝而去歐陽史庚申杜威及契丹戰于陽城敗之俱與是書同惟遼史云己未重威守貞引兵南遁追至陽城大敗之復以走卒

為方陣來拒與戰十餘合是遼師未嘗言敗也蓋當時南北軍俱有掩飾故紀載不同如此

大軍至白團衛村下營○案歐陽史作衛村通鑑攷異引漢高祖實錄作白檀遼史從是書作白團衛村

嘉哩舊作諧里今改 默埒舊作沒刺今改

舊五代史卷八十三攷證



總校官編修 臣 朱 鈐

校對官中書 臣 吳翼成

謄錄監生 臣 譚湘鏡

欽定四庫全書卷八十九會要

史部

舊五代史卷八十九  
四至

詳校官內閣侍讀臣孫球



欽定四庫全書薈要卷五千四百八十五

舊五代史卷八十四

宗門下侍郎參知政事監修國史薛居正等撰

少帝紀四

開運二年夏五月丙申朔帝御崇元殿受朝大赦天下  
丁酉以右衛上將軍馬萬為左金吾上將軍致仕戊戌  
陝州節度使宋彥筠移鎮鄭州澶州節度使何建移鎮



晉書第十



河陽以左神武統軍潘瓌為澶州節度使以宣徽北院  
使李彥韜遙領壽州節度使兼侍衛馬軍都指揮使以  
滄州節度使田武遙領夔州節度使兼侍衛步軍都指  
揮使辛亥白虹貫日壬子宰臣桑維翰劉昫李崧和凝  
並加階爵禮部尚書竇貞固改刑部尚書太常寺卿王  
松改工部尚書以尚書左丞龍敏為太常卿以翰林學  
士承旨兵部侍郎李慎儀為尚書左丞以御史中丞張  
允為兵部侍郎知制誥充翰林學士承旨以左諫議大

夫顏衍為御史中丞

宋史顏衍傳喪亂之後朝綱不振衍執憲頗有風采嘗上言纔除御

史者旋授外藩賓佐復有以私故細事求假外拜州郡無參謁之儀出入失風憲之體漸恐四方得以輕易百辟無所準繩請自今藩鎮幕僚勿得任臺官雖親王宰相出鎮亦不得奏充賓佐非奉制勘事勿得出京自餘不令釐雜務詔惟辟以兵部侍郎弘文館學士判館事召入幕餘從其請

田敏為國子祭酒以戶部侍郎段希堯為兵部侍郎以工部侍郎邊蔚為戶部侍郎依前權知開封府事以左散騎常侍李式為工部侍郎以給事中王仁裕為左散騎常侍甲寅以華州節度使趙瑩為開封尹以皇弟開

封尹重賡為秦州節度使以宣徽南院使劉繼勳為華  
州節度使以前鄆州節度使張從恩為晉州節度使丙  
辰杜威來朝定州奏大風電北嶽廟殿宇樹木悉摧拔  
之六月乙丑朔帝御崇元殿百官入閣監修國史劉昫  
史官張昭遠等以新修唐書紀志列傳并目錄凡二百  
三卷上之賜器帛有差癸酉以恒州節度使杜威為天  
雄軍節度使充鄴都留守以鄴都留守馬全節為恒州  
節度使以翰林學士金部郎中知制誥徐台符為中書

舍人以翰林學士禮部郎中知制誥李瀚為中書舍人  
翰林學士都官郎中劉溫叟加知制誥翰林學士主客  
員外郎范質改比部郎中知制誥竝依舊充職祠部員  
外郎知制誥張沆本官充學士以太常少卿陶穀為中

書舍人

宋史陶穀傳穀性急率嘗與充帥安審信集會  
杯酒相失為審信所奏時方姑息武臣穀坐責

授太常少卿嘗上言頃涖西臺每見臺司詳斷刑獄少  
有即時決者至于閭閻夫婦小有爭訟淹滯即時坊市  
死亡喪葬必俟臺司判狀奴婢病亡亦須檢驗吏因緣  
為姦而邀求不已經旬不獲埋瘞望申條約以革其弊  
從之俄拜已亥以邠州節度使劉景巖為陝州節度使  
中書舍人

己卯新授恒州節度使馬全節卒輟朝贈中書令壬午  
大理卿張仁愿卒贈秘書監遣刑部尚書竇貞固等分  
詣寺觀禱雨己丑以定州節度使王周為恒州節度使  
以前易州刺史安審約為定州留後是月兩京及州郡  
十五竝奏旱秋七月乙未朔以侍衛步軍都指揮使領  
夔州節度使田武為昭義軍節度使甲寅左諫議大夫  
李元龜奏請禁止天下僧尼典買院舍從之丙辰前少  
府監李鍇貶坊州司戶坐冒請逃死吏人衣糧入已故

也庚申以前齊州防禦使薛可言為延州兵馬留後八月甲子朔日有蝕之中書舍人陶穀奏請權廢太常寺二舞郎從之丙寅宰臣和凝罷相守右僕射以樞密使馮玉為中書侍郎平章事使如故乙亥詔諸御史今後除準式請假外不得以細故小事請假離京除奉制命差推事及按察外不得以諸雜細務差出丙子以靈州節度使馮暉為邠州節度使加檢校太尉以前鄜州節度使丁審琪為左羽林統軍以前鄜州節度使郭謹為

左神武統軍西京留司御史臺奏新授鄧州節度使宋  
彥筠于銀沙灘斬廳頭鄭溫詔鞠之款云彥筠出身軍  
旅不知事體不合專擅行法詔釋其罪以工部尚書王  
松權知貢舉丁丑以前晉州節度使安叔千為右金吾  
上將軍以三司副使給事中李穀為磁州刺史充北面  
水陸轉運使分遣使臣于諸道率馬戊寅以左金吾上  
將軍皇甫立為左衛上將軍以右羽林統軍李懷忠為  
左武衛上將軍庚辰新授潞州節度使田武卒輟朝贈

太尉戊子湖南奏靜江軍節度使馬希杲卒九月丙申  
以西京留守北面馬步軍都排陣使景延廣為北面行  
營副招討使丁酉以刑部侍郎趙遠為戶部侍郎以工  
部侍郎李式為刑部侍郎以中書舍人盧價為工部侍  
郎價久次綸闈舊例合轉禮部侍郎或御史中丞宰臣  
馮玉擬此官桑維翰以為資望淺不署狀無何維翰休  
沐數日玉獨奏行之維翰由是不樂與玉有間矣己亥  
幸繁臺觀馬遂幸李守貞第庚子以晉州節度使張從



恩為潞州節度使吏部侍郎張昭遠加階爵酬修唐史之勞也

宋史張昭遠傳加金紫階進爵邑

戊申升曹州為節鎮以威信

軍為軍額詔李守貞率兵屯澶州己酉月掩昴宿以宣徽北院使焦繼勲為宣徽南院使以內客省使孟承誨為宣徽北院使壬子以前太子詹事王居敏為鴻臚卿李專美為大理卿以太子賓客致仕馬胤孫為太子詹事甲寅移泰州理所于滿城縣乙卯詔相州節度使張彥澤率兵屯恒州冬十月戊寅以河陽節度使何建為

涇州節度使以許州節度使李從溫為河陽節度使以  
前鄭州節度使石贊為曹州節度使庚午遣使太子賓  
客羅周岳使副太子右庶子王延濟冊兩浙節度使錢  
弘佐為守太尉辛未右金吾衛上將軍楊彥詢卒贈太  
子太師丁丑高麗遣使貢方物庚辰以前延州節度使  
王令溫為靈州節度使庚寅以邢州兵馬留後劉在明  
為晉州兵馬留後以前河陽留後方太為邢州留後癸  
巳升陳州為節鎮以鎮安軍為軍額十一月戊戌以邠

州節度使馮暉兼侍衛步軍都指揮使克北面行營先鋒馬步軍都指揮使以權知高麗國事王武為檢校太保使持節玄菟州都督克大義軍使封高麗國王癸卯日南至帝御崇元殿受朝賀戊申兩浙奏順化軍節度使錢鐸卒甲寅以壽州節度使侍衛馬軍都指揮使李彥韜為陳州節度使典軍如故丙辰前商州刺史李俊除名坐受財枉法也十二月乙丑以兩浙節度使吳越國王錢弘佐兼東南面兵馬都元帥丙寅以吳越國金

馬左廂都指揮使湖州刺史胡思進遙領虔州昭信軍  
節度使以吳越國金馬右廂都指揮使明州刺史闕璠  
遙領宣州寧國軍節度使竝典軍如故左羽林統軍丁  
審琪卒贈太尉辛未以工部侍郎盧價為禮部侍郎以  
右散騎常侍集賢殿學士判院事司徒詡為工部侍郎  
依前充職以前中書舍人殷鵬為給事中充樞密直學  
士以給事中劉知新為右散騎常侍乙亥陝府節度使  
劉景巖來朝丁丑狩于近郊獵也已卯光祿卿致仕陳

玄卒于太原庚辰命使冊高麗國王王武癸未以前兗  
州節度使安審信為華州節度使丁亥以樞密使中書  
令桑維翰為開封尹以司空門下侍郎平章事劉昫判  
三司以左僕射門下侍郎平章事李崧為守侍中充樞  
密使以開封尹趙瑩為中書令弘文館大學士以宣徽  
南院使焦繼勳知陝州軍州事

宋史焦繼勳傳西人寇  
邊朝議發師致討繼勳

抗疏請行拜秦州觀察使兼諸蕃水陸轉運使既至推  
恩信設方畧招誘諸部相率奉玉帛牛酒乞盟邊境以  
安俄徙知陝州已丑邠州節度使馮暉準詔來朝是歲帝每遇

四方進獻器皿多以銀于外府易金而入謂左右曰金

者貴而且輕便于人力識者以為北遷之兆也

宋史劉  
濤傳少

帝奢侈常以銀易金廣其器皿李崧判三司令上庫金之數及崧以原簿較之少數千緡崧責曰帑庫通式一曰不受虛數毫釐則有重典濤曰帑司常有報不盡數以備宣索崧令有司劾濤濤事迫以情告樞密使桑維翰乃止罰一月俸

開運三年春正月癸巳朔帝御崇元殿受朝賀仗衛如式詔改鑄天下合同印書詔印御前竝以黃金為之己亥貝州梁漢璋奏蕃寇屯聚將謀入寇詔符彥卿屯荆

州口

宋史符彥卿傳再出河朔彥卿不與易其行伍配以羸師數千戍荊州口

癸卯以前華

州節度使劉繼勳為同州節度使以陝州節度使劉景

巖為鄧州節度使丙午以宣徽南院使知陝州事焦繼

勳為陝州留後丁未刑部員外王涓賜私家自盡坐私

用官錢經營求利也右司郎中李知損貶均州司戶員

外置馳驛發遣坐前任度支判官日與解縣權鹽使王

景遇交遊借貸故也已酉詔侍衛親軍副都指揮使李

守貞率師巡撫北邊辛亥以皇弟秦州節度使重胤為

許州節度使以許州節度使安審琦為兗州節度使以  
兗州節度使趙在禮為晉昌軍節度使癸丑以涇州節  
度使何建為秦州節度使以前貝州節度使史威為涇  
州節度使乙卯定州奏契丹入寇己未二王後守太僕  
少卿襲鄴國公楊延壽除名配流威州終身勿齒延壽  
奉命于磁州檢苗受贓二百餘匹準律當絞有司以二  
王後入議故貸其死二月壬戌朔日有蝕之詔滑州皇  
甫遇率兵援糧入易定等州甲子以滄州留後王景為



本州節度使右僕射和凝逐月別給錢五萬廉糧芻粟等優舊相也辛未魯國大長公主史氏薨輟朝三日丙子光祿卿致仕王弘贄卒贈太常卿迴鶻遣使貢方物升桂州全義縣為溇州仍隸桂州其全義縣改為德昌縣從湖南馬希範所請也壬午以前晉昌軍節度使安彥威充北面行營副都統以宣徽北院使兼太府卿孟承誨為右武衛大將軍充職是日幸南莊命臣寮汎舟飲酒因幸杜威園醉方歸內甲申河陽節度使李從溫

薨輟朝贈太師三月壬辰朔以權知河西節度使張遵古為河西留後乙未以御史中丞顏珣為戶部侍郎以戶部侍郎趙遠為御史中丞丙申以邠州節度使兼侍衛步軍都指揮使馮暉為河陽節度使以前涇州節度使李德琬為邠州節度使李守貞奏大軍至衡水己亥奏獲鄭州刺史趙思恭癸卯奏大軍迴至冀州戶部侍郎顏珣上表以母老乞解官就養從之戊申以皇子齊州防禦使延煦為澶州節度使辛亥密州上言飢民殍

者一千五百庚申以瓜州刺史曹元忠為沙州留後夏  
四月辛酉朔李守貞自北班師到關太原奏吐渾白可  
久奔歸契丹諸侯咸有異志乙亥宰臣詣寺觀禱雨曹  
州奏部民相次餓死凡三千人時河南河北大饑殍殍  
甚衆沂密兗鄆寇盜羣起所在屯聚剽劫縣邑吏不能  
禁兗州節度使安審琦出兵捕逐為賊所敗戊寅幸相  
國寺禱雨皇子延煦與晉昌軍節度使趙在禮結婚命  
宗正卿石光贊主之五月庚寅朔以兵部郎中劉皞為

太府卿戊戌以前同州節度使馮道為鄧州節度使定  
州奏部民相次擄殺流移約五千餘戶青州奏全家殍  
死者一百一十二戶沂州奏淮南遣海州刺史領兵一  
千五百人應接賊頭常知及詔兗州安審琦領兵捕逐  
甲辰以前太子賓客韋勲為太子賓客兗州安審琦奏  
淮賊抽退賊頭常知及與其次首領武約等竝乞歸命  
丁未幸大年莊遊船習射帝醉甚賜羣官器帛過差夜  
分方歸內戊申以鄆州留後李殷為定州節度使辛亥

詔皇甫遇為北面行營都部署張彥澤為副李殷為都  
監領兵赴易定等州尋止其行甲寅以貝州留後梁漢  
璋為貝州節度使以左神武統軍郭謹為鄜州節度使  
六月庚申朔登州奏文登縣部內有銅佛像四甕佛像  
十自地湧出狼山招收指揮使孫方簡叛據狼山歸契  
丹乙丑詔諸道不得橫薦官寮如本處幕府有闕即得  
奏薦丙寅以前招義軍節度使李從敏為河陽節度使  
以河陽節度使兼侍衛步軍都指揮使馮暉為靈州節

度使壬午以鄆州節度使兼侍衛親軍都指揮使高行  
周為宋州節度使加兼中書令充北面行營副都統以  
宋州節度使侍衛親軍都指揮使

以下有  
闕文

定州奏蕃寇

壓境詔李守貞為北面行營都部署滑州皇甫遇為副  
相州張彥澤充馬軍都指揮使定州李殷充步軍都指  
揮使七月壬辰以禮部尚書王延為刑部尚書以工部  
尚書王松為禮部尚書以太常卿龍敏為工部尚書以  
左丞李慎儀為太常卿以吏部侍郎張昭遠為左丞以

右丞李詳為吏部侍郎以前義州刺史李玘為右丞前

晉昌軍節度使安彥威薨輟朝贈太師丙申兩浙節度

使吳越國王錢弘佐加守太師北京留守河東節度使

北平王劉知遠加守太尉滄州奏蕃寇攻饒安縣楊劉

口河決西岸水濶四十里以前鄧州節度使劉景巖為

太子太師致仕辛亥宋州穀熟縣河水雨水一槩東流

漂沒秋稼丁巳大理卿李專美卒戊午詔偽清泰朝經

削奪官爵朱弘昭馮贇康義誠王思同藥彥稠等竝復

其官爵自夏初至是河南河北諸州郡餓死者數萬人  
羣盜蜂起剽畧縣鎮霖雨不止川澤汎漲損害秋稼八  
月己未朔以左諫議大夫裴羽為給事中庚申李守貞  
皇甫遇駐軍定州辛酉幸南莊召從臣宴樂至暮還宮  
詔潞州運糧十三萬赴恒州癸亥以右散騎常侍張煦  
為青州刺史李守貞奏大軍至望都縣相次至長城北  
遇敵千餘騎轉鬪四十里斬蕃將嘉哩相公丁卯詔班  
師庚午以前亳州防禦使邊蔚為戶部侍郎以刑部侍



郎李式為戶部侍郎充三司副使以禮部侍郎盧價為

刑部侍郎以樞密直學士左散騎常侍邊光範為禮部

侍郎充職

宋史邊光範傳少帝以光範藩邸舊僚待遇尤厚因遊宴見光範位翰林學士下即日拜

尚書禮部侍郎知制誥充

翰林學士仍直樞密院

辛未以右龍武統軍周密為

延州節度使癸酉河東節度使劉知遠奏誅吐渾大首

領白承福白鐵匱赫連海龍等並夷其族凡四百口蓋

利其孳畜財寶也人皆寃之甲戌以大理少卿劇可久

為大理卿棣州刺史慕容彥超削奪在身官爵房州安

置坐前任濮州擅出省倉麥及私賣官麴準法處死太原節度使劉知遠上表救之故貸其死丙戌靈州馮暉奏與威州刺史藥元福于威州土橋西一百里遇吐蕃七千餘人大破之斬首千餘級是月秦州雨兩旬不止鄴都雨水一丈洛京鄭州貝州大水鄴都夏津臨清兩縣餓死民凡三千三百盜入臨濮費縣秋九月壬辰鄆州節度使侍衛親軍都指揮使李守貞加兼侍中滑州節度使皇甫遇進封邠國公相州節度使張彥澤加檢

校太尉甲午以權知威武軍節度使李弘達為檢校太尉同平章事充福建節度使知閩國事乙未前商州刺史李俊賜死坐與親妹姦及行劍斫殺女使又殺部曲孫漢榮強姦其妻準法棄市詔賜死于家己亥張彥澤奏破蕃賊于定州界斬首二十餘級追襲百餘里生擒蕃將四人摘得金耳環二副進呈癸卯太原奏破契丹于楊武谷殺七千餘人甲辰以天策上將軍江南諸道都統楚王馬希範兼諸道兵馬都元帥詔開封府以霖

雨不止應京城公私僦舍錢放一月乙巳詔安審琦率  
兵赴鄴都皇甫遇赴相州丙午以太子少保楊凝式為  
太子少傅以刑部尚書王延為太子少保前潁州團練  
使竇貞固為刑部尚書是月河南河北關西諸州奏大  
水霖雨不止溝河汎溢水入城郭及損害秋稼是月契  
丹瀛州刺史詐為書與樂壽將軍王巒愿以本城歸順  
且言城中蕃軍不滿千人請朝廷發軍襲取之已為內  
應又云今秋苦雨川澤漲溢自瓦橋以北水勢無際戎

王已歸本國若聞南夏有變地遠阻水雖欲奔命無能及也又繼繼有密奏苦言瀛鄭可取之狀先是前歲中車駕駐于河上曾遣邊將遺書于幽州趙延壽勸令歸國延壽尋有報命依違而已是歲三月復遣鄴都杜威致書于延壽且述朝旨啖以厚利仍遣洺州軍將趙行實賫書而往潛申密款行實曾事延壽故遣之七月行實自燕迴得延壽書且言久陷邊廷願歸中國乞發大軍應接即拔身南去叙致懇切辭旨綿密時朝廷欣然

從之復遣趙行實計會延壽大軍應接之所有瀛州大將遣所親齎蠟書至闕下告云欲謀翻變以本城歸命未幾會彼有告變者事不果就至是瀛州守將劉延祚受戎王之命詐輸誠款以誘我軍國家深以為信遂有出師之議

舊五代史卷八十四

舊五代史卷八十四攷證

晉少帝紀四監修國史劉昫史官張昭遠等以新修唐書紀志列傳并目錄凡二百三卷案郡齋讀書志直齋書錄解題並作二百卷五代會要作二百二卷目錄一卷

己亥幸繁臺觀馬案歐陽史作閱馬于萬龍岡

皇子延煦與晉昌軍節度使趙在禮結婚案皇子延煦娶趙在禮女通鑑作三月庚申與是書作四月戊



寅異

己亥張彥澤奏破蕃賊于定州界 案歐陽史作辛丑  
張彥澤及契丹戰于新興敗之

是月契丹瀛州刺史詐為書與樂壽將軍王繼愿以本  
城歸順 案瀛州刺史下疑脫劉延祚三字通鑑攷  
異云歐陽史作高年翰按陷蕃記前云延祚詐輸誠  
款後云大軍至瀛州偵知蕃將高年翰潛師而出蓋  
延祚為刺史年翰乃戍將耳

嘉哩舊作解里今改

舊五代史卷八十四攷證

欽定四庫全書薈要卷五千四百八十六

舊五代史卷八十五

宋門下侍郎參知政事監修國史薛居正等撰

晉書第十一

少帝紀五

開運三年冬十月甲子正衙命使冊皇太妃安氏乙丑  
以樞密直學士禮部侍郎邊光範為翰林學士以給事  
中邊歸譫為左散騎常侍以翰林學士祠部員外郎知

制誥張沆為右諫議大夫辛未以鄴都留守杜威為北  
面行營都招討使以侍衛親軍都指揮使鄆州節度使  
李守貞為兵馬都監兗州安審琦為左右廂都指揮使  
徐州符彥卿為馬軍左廂都指揮使滑州皇甫遇為馬  
軍右廂都指揮使貝州梁漢璋為馬軍都排陣使前鄧  
州宋彥筠為步軍左廂都指揮使奉國左廂都指揮使  
王饒為步軍右廂都指揮使洺州團練使薛懷讓為先  
鋒都指揮使

案通鑑載當時勅榜曰先取瀛鄆安定關  
南次復幽燕盡平塞北蓋狃于陽城之役

而驪  
驕也

癸酉冊吳國夫人馮氏為皇后乙亥以侍衛馬軍

都指揮使李彥韜權知侍衛司事丙戌鳳翔節度使秦  
王李從曠薨輟朝贈尚書令丁亥邠州節度使李德珣  
卒輟朝贈太尉十一月戊子朔以給事中盧撰為右散  
騎常侍以尚書兵部郎中兼侍御史知雜事陳觀為左  
諫議大夫觀以祖諱義乞改官尋授給事中庚寅樞密  
使中書侍郎兼戶部尚書平章事馮玉加尚書右僕射  
以皇子鎮寧軍節度使延煦為陝州節度使以陝州留

後焦繼勲為鳳翔留後以前定州留後安審琦為邠州  
留後以右僕射和凝為左僕射甲午兩浙節度使吳越  
國王錢弘佐起復舊任丁酉詔李守貞知幽州行府事  
戊申日南至御崇元殿受朝賀是月北面行營招討使  
杜威率諸將領大軍自鄴北征師次瀛州城下貝州節  
度使梁漢璋戰死杜威等以漢璋之敗遂收軍而退行  
次武強聞戎王入寇欲取直路自冀貝而南會張彥澤  
領騎自鎮定至且言契丹可破之狀于是大軍西趨鎮

州十二月丁巳朔

以下疑有闕文據通鑑云丁巳朔李穀自書密奏具言大軍危急之勢請

車駕幸滑州遣高行周符彥卿扈從及發兵守澶州河陽以備敵之奔衝遣軍將闕勲走馬上之

已未

杜威奏駐軍于中渡橋庚申以前司農卿儲延英為太子賓客詔徐州符彥卿屯澶州辛酉詔澤潞鄴都邢洺河陽運糧赴中渡杜威遣人口奏軍前事宜勢迫故也壬戌又遣高行周屯澶州景延廣守河陽博野縣都監張鵬入奏蕃軍事勢丙寅定州李殷奏前月二十八日夜領捉生四百人往曲陽嘉山下逢賊軍車帳殺千餘



人獲馬二百匹詔宋州高行周充北面行營都部署符

彥卿充副邢州方太充都虞侯領後軍駐于河上以備

敵騎之奔衝也時契丹遊騎涉滹水而南至欒城縣自

是中渡寨為蕃軍隔絕探報不通朝廷大恐故委行周

等繼領兵師守扼津要且以張其勢也已巳邢州方太

奏此月六日契丹與王師戰于中渡王師不利奉國都

指揮使王清戰死庚午幸沙臺射兔壬申始聞杜威李

守貞等以此月十日率諸軍降于契丹是夜相州節度

使張彥澤受契丹命率先鋒二千人自封邱門斬關而入癸酉旦張彥澤頓兵于明德門外京城大撓前曹州節度使石贇死帝之堂叔也時自中渡寨隔絕之後帝與大臣端坐憂危國之衛兵悉在北面計無所出十六日聞滹水之降是夜偵知張彥澤已至滑州召李崧馮玉李彥韜入內計事方議詔河東劉知遠起兵赴難至五鼓初張彥澤引蕃騎入京宮中相次火起帝自攜劍驅擁后妃以下十數人將同赴火為親校薛超所持俄

自寬仁門遞入契丹主與皇太后書帝乃止旋令撲滅  
烟火大內都點檢康福全在寬仁門宿衛登樓覘賊彥  
澤呼而下之癸酉帝奉表于契丹主曰孫臣某言今月  
十七日寅時相州節度使張彥澤都監富珠哩部領大  
軍入京齎到翁皇帝賜太后書示于潯沱河下杜威一  
行馬步兵士見領蕃漢步騎來幸汴州者往者唐運  
告終中原失馭數窮否極天缺地傾先人有田一成有  
衆一旅兵連禍結力屈勢孤翁皇帝救患摧鋒興利除

害躬擐甲胄深入寇塲犯露蒙霜度雁門之險馳風掣  
電行中冀之誅黃鉞一麾天下大定勢凌宇宙義感神  
明功成不居遂興晉祚則翁皇帝有大造于石氏也旋  
屬天降鞠凶先君即世臣遵承遺旨繼紹前基諒闇之  
初荒迷失次凡有軍國重事皆委將相大臣至於擅繼  
宗祧既非稟命輕發文字輒敢抗尊自啓釁端果貽赫  
怒禍至神惑運盡天亡十萬師徒皆望風而束手億兆  
黎庶悉延頸以歸心臣負義包羞貪生忍恥自貽顛覆

上累祖宗偷度晨昏苟存視息翁皇帝若惠顧疇昔稍  
霽雷霆未賜靈誅不絕先祀則百口荷更生之德一門  
銜罔報之恩雖所願焉非敢望也臣與太后并妻馮氏  
及舉家戚屬見于郊野面縛俟罪次所有國寶一面金  
印三面今遣長子陝府節度使延煦次子曹州節度使  
延寶管押進納并奉表請罪陳謝以聞甲戌張彥澤遷  
帝與太后及諸宮屬于開封府遣控鶴指揮使李榮將  
兵監守是夜開封尹桑維翰宣徽使孟承誨皆遇害帝

以契丹主將至欲與太后出迎彥澤先表之稟契丹主之旨報云比欲許爾朝覲上國臣寮奏言豈有兩箇天子道路相見今賜所佩刀子以慰爾心己卯皇子延煦延寶自帳中迴得偽詔慰撫帝表謝之時契丹主以所送傳國寶製造非工與載籍所述者異使人來問帝進狀曰頃以偽主王從珂于洛京大內自焚之後其真傳國寶不知所在必是當時焚之先帝受命旋製此寶在位臣寮備知其事臣至今日敢有隱藏云時移內庫至

府帝使人取帛數段主者不與謂使者曰此非我所有也又使人詣李崧求酒崧曰臣有酒非敢愛惜慮陛下杯酌之後憂躁所作別有不測之事臣以此不敢奉進丙戌晦百官宿封禪寺明年正月朔契丹主次東京城北百官列班遙辭帝于寺詣北郊以迎契丹主帝舉族出封邱門肩輦至野契丹主不與之見遣泊封禪寺文武百官素服紗帽迎謁契丹主于郊次俯伏俟罪契丹主命起之親自慰撫契丹主遂入大內至昏出宮是夜

宿于赤堁契丹主下詔應晉朝臣寮一切仍舊朝廷儀

制竝用漢禮戊子殺鄭州防禦使楊承勲責以背父之

罪令左右鬻割而死

遼史以其弟承信為平盧軍節度使襲父爵

已丑斬張

彥澤于市以其剽劫京城恣行屠害也

遼史以張彥澤擅徙重貴開封

殺桑維翰縱兵大掠不道斬于市

庚寅洛京留守景延廣自扼吭而死

辛卯契丹制降帝為光祿大夫檢校太尉封負義侯黃

龍府安置其地在渤海國界癸巳遷帝于封禪寺遣蕃

大將崔廷勲將兵守之癸卯帝與皇太后李氏皇太妃



安氏皇后馮氏皇弟重睿皇子延煦延寶俱北行以宮

嬪五十人內官三十人東西班五十人醫官一人控鶴

官四人御廚七人茶酒三人儀鸞司三人軍健二十人

從行宰臣趙瑩樞密使馮玉侍衛馬軍都指揮使李彥

韜隨帝入蕃契丹主遣三百騎援送而去所經州郡長

史迎奉皆為契丹主阻絕有所供饋亦不通

宋史李穀傳少帝蒙

塵而北舊臣無敢候謁者穀獨拜迎于路君臣相對泣下穀曰臣無狀負陛下因傾囊以獻

嘗一日

帝與太后不能得食乃殺畜而啖之帝過中渡橋閱杜

重威營寨之迹慨然憤歎謂左右曰我家何負為此賊  
所破天乎天乎于是號慟而去至幽州傾城士庶迎看  
于路見帝慘沮無不嗟歎

宣政雜錄徽宗北狩經薊縣  
梁魚務有還鄉橋石少帝所

命名也里人  
至今呼之

駐留旬餘州將承契丹命犒帝于府署趙

延壽母以食饌來獻自范陽行數十程過薊州平州至  
榆關沙塞之地畧無供給每至宿頓無非路次一行乏  
食宮女從官但採木實野蔬以救飢弊又行七八日至  
錦州契丹迫帝與妃后往拜案巴堅遺像帝不勝屈辱

泣曰薛超誤我不令我死以至今日也又行數十程渡  
遼水至黃龍府此即戎王所命安置之地也六月契丹  
國母召帝一行往懷密州州在黃龍府西北千餘里行  
至遼陽皇后馮氏以帝陷蕃過受艱苦令內官潛求毒  
藥將自飲之并以進帝不果而止又行二百里會國母  
為永康王所執永康王請帝却往遼陽城駐泊帝遣使  
奉表于永康且賀克捷自是帝一行稍得供給漢乾祐  
元年四月永康王至遼陽帝與太后並詣帳中帝御白

衣紗帽永康止之以常服謁見帝伏地雨泣自陳過咎  
永康使左右扶帝上殿慰勞久之因命設樂行酒從容  
而罷永康帳下從官及教坊內人望見故主不勝悲咽內  
人皆以衣帛藥餌獻遺于帝及永康發離遼陽取內官十  
五人東西班十五人及皇子延煦並令隨帳上陘陘即契  
丹避暑之地也有綽諾錫里者即永康之妻兄也知帝  
有小公主在室詣帝求之帝辭以年幼不可又有東西班  
數輩善于歌唱綽諾錫里又請之帝乃與之後數日永康

王馳取帝幼女而去以賜綽諾錫里至八月永康王下陞太后  
馳至霸州詣永康求于漢兒城寨側近賜養種之地永康  
許諾令太后于建州住泊漢乾祐二年二月帝自遼陽城發  
赴建州行至中路太妃安氏得疾而薨乃焚之載其燼骨而  
行帝自遼陽行十數日過儀州霸州遂至建州節度  
使趙延暉盡禮奉迎館帝于衙署中其後割寨地五  
千餘頃其地至建州數十里帝乃令一行人員于寨  
地內築室分耕給食于帝是歲舒嚕王子遣契丹數騎

詣帝取內人趙氏聶氏疾馳而去趙聶者帝之寵姬也  
及其被奪不勝悲憤漢乾祐三年八月太后薨周顯德  
初有漢人自寨北而至者言帝與后及諸子俱無恙猶  
在建州其隨從職官役使人輩自蕃中亡歸物故者大

半矣

郡齋讀書志云晉朝臨蕃記范質撰質石晉末在翰林為出帝草降表知其事為詳記少主初遷于

黃龍府後居于建州凡十八年而卒按契丹丙午歲入

汴順數至甲子歲為十八年實太祖乾德二年也五

代史補少主之嗣位也契丹以不俟命而擅立又景延

廣辱其使契丹怒舉國南侵以駙馬都尉杜重威等領

駕下精兵甲禦之于中流渡橋既而契丹之衆已深入

而重威等奏報未到朝廷時桑維翰罷相為開封府尹

謂僚佐曰事急矣非大臣鉗口之時乃叩內閣求見欲請車駕親征以固將士之心而少主方在後苑調鷹至暮竟不召維翰退而歎曰國家阽危如此草澤逋客亦宜下問況大臣求見而不召耶事亦可知矣未幾杜重威之徒降于契丹少主遂北遷

史臣曰少帝以中人之才嗣將墜之業屬上天不祐仍歲大饑尚或絕強敵之歡盟鄙輔臣之謀畧奢淫自縱謂有泰山之安委託非人坐受平陽之辱族行萬里身老窮荒自古亡國之醜者無如帝之甚也千載之後其如恥何傷哉





舊五代史卷八十五

舊五代史卷八十五攷證

晉少帝紀五己未杜威奏駐軍于中渡橋 案通鑑甲寅威等至中度橋十二月己未帝始聞大軍屯中度胡三省註云強寇深入諸軍孤危而驛報七日始達晉之為兵可知矣歐陽史作己未杜威軍于中渡蓋以奏聞之日為駐軍之日

降帝為光祿大夫 光祿遼史避諱作崇祿

內官三十人 案遼史作內宦三人

軍健二十人 案遼史作健卒十人

富珠哩舊作傳住兒今改 按巴堅舊作阿保機今改

綽諾錫里舊作禪奴舍利今改 舒嚕舊作述律

今改

舊五代史卷八十五攷證

欽定四庫全書薈要卷五千四百八十七

舊五代史卷八十六

宋門下侍郎參知政事監修國史薛居正等撰

晉書第十二

后妃列傳一

案晉后妃傳永樂大典已佚今采五代會要通鑑契丹國志文獻通攷所

載晉后妃事分註

以補是書之闕

高祖皇后李氏

五代會要高祖皇后李氏唐明宗第三女天成三年四月封永寧公主長興四

年九月進封魏國公主清泰二年九月改封晉國長公主至天福六年十一月尊為皇后七年六月尊為皇太

后開運四年三月與少帝同遷于契丹之黃龍府漢乾祐三年八月二十五日崩于蕃中之建丑文獻通攷云天福二年有司請立皇后帝以宗廟未立謙抑未遑帝崩出帝即位乃尊為皇太后契丹國志載皇太后降表云晉室皇太后媳婦李氏妾言張彥澤富珠哩等至伏蒙皇帝阿翁降書安撫者妾伏念先皇帝頃在并汾適逢屯難危同累卵急若倒懸智勇俱窮朝夕不保皇帝阿翁發自冀北親抵河東跋履山川踰越險阻立平巨孽遂定中原救石氏之覆亡立晉朝之社稷不幸先帝厭代嗣子承祧不能繼好息民而反虧恩辜義兵戈屢動駟馬難追威實自貽咎將誰執今穹旻震怒中外攜離上將牽羊六師解甲妾舉宗負釁視景偷生惶惑之中撫問斯至明宣恩旨曲賜含容慰諭丁寧神爽飛越豈謂已垂之命忽蒙更生之恩省罪責躬九死未報今遣孫男廷煦延寶奉表請罪陳謝以聞又帝紀云會同十一年正月朔出帝太后迎遼帝于封丘門外帝辭不

見館于封禪寺遣其將崔廷勳以兵守之是時雨雪連旬外無供億上下凍餒太后使人謂寺僧曰吾嘗于此飯僧數萬今日豈不相憫耶僧辭以遼帝之意難測不敢獻食少帝陰祈守者乃稍得食遼降少帝為光祿大夫檢校太尉封負義侯遷于黃龍府即慕容氏和龍城也帝使人謂太后曰吾聞爾子重貴不從母教而至于此可求自便勿與俱行太后荅曰重貴事妾甚謹所失者違先君之志絕兩國之歡然重貴此去幸蒙大惠全身保家母不隨子欲何所歸于是太后與馮后皇弟重睿子延煦延寶舉族從晉侯而北天祿元年四月帝至遼陽晉侯白衣紗帽與太后皇后上謁于帳中五月帝上陞取晉侯所從宦者十五人東西班十五人及皇子延煦而去八月帝下陞太后自馳至霸州謁帝求于漢兜城側賜地耕牧以為生許之帝以太后自行十餘日遣與延煦俱還遼陽二年徙晉侯太后于建州三年秋八月晉李太后病無醫藥仰天號泣戟手罵杜重威李

守貞曰吾死不置汝病亟謂晉侯曰吾死焚其骨送范陽佛寺無使吾為邊地鬼也富珠哩舊作傳住兒今

改正

太妃安氏

文獻通攷安太妃代北人不知其世家生出帝帝立尊為皇太妃契丹國志云天祿二年

春二月徙晉侯太后于建州中途安太妃卒遺命晉侯曰焚骨為灰南向颺之庶幾遺魂得返中國也

少帝皇后張氏

案五代會要天福八年十月追冊攷是書少帝紀云追冊故妃張氏為皇后張

從訓傳亦云高祖鎮太原

為少帝娶從訓長女為妃

皇后馮氏

案五代會要開運三年十月冊通鑑云天福八年冬十月戊申立吳國夫人馮氏為皇后

初高祖愛少弟重脩養以為子及留守鄴都娶副留守馮蒙女為其婦重脩早卒馮夫人寡居有美色帝見而

悅之高祖崩梓宮在殯帝遂納之羣臣皆賀帝謂馮道等曰皇太后之命與卿等不任大慶羣臣出帝與夫人酣飲過梓宮前醞而告曰皇太后之命與先帝不任大慶左右失笑帝亦自笑謂左右曰我今日作新壻何如夫人與左右皆大笑太后雖恚而無如之何既正位中宮頗預政事后兄玉時為禮部郎中監鐵判官帝驟擢用至端明殿學士戶部侍郎與議政事文獻通攷云契丹入京師后隨帝北遷不知所終又案五代會要載晉內職云高祖潁川郡夫人蔡氏天福三年八月勅少帝寶省李氏封隴西郡夫人張氏封春宮夫人充皇后宮尚宮並天福八年十二月二日勅前左御正齊國夫人吳氏進封燕國夫人書省魏國夫人崔氏進封梁國夫人前右御正天水郡夫人趙氏封衛國夫人司簿孟氏封沂國夫人前司簿李氏封隴西郡夫人弟子院使齊氏大使郭氏副使賈氏並封本縣君太子宫尚宮陳留郡夫人何氏進封鄭國夫人河南郡夫人元氏進封



齊國夫人知容出使夫人石氏封武威郡夫人春宮姚氏常氏焦氏王氏陶氏魏氏趙氏七人並超封郡夫人寶省婉美趙氏封天水郡夫人武氏以下十一人並授春宮天福八年十一月勅清河郡夫人張氏彭城郡夫人劉氏並充太后宮司寶南陽郡夫人路氏出使夫人趙氏白氏並充皇后宮司賓開運二年八月勅又案是書不載外戚傳據五代會要云晉高祖長女長安公主降楊承祚天福二年五月封至六年五月卒追封秦國公主至七年九月又追封梁國長公主從長女高平縣主第二女新平縣主第三女千乘縣主孫女永慶縣主並天福七年五月封

舊五代史卷八十六

舊五代史卷八十六攷證

晉后妃列傳一高祖皇后李氏 案五代會要李后在  
長興中進封魏國公主清泰二年改封晉國長公主  
歐陽史作清泰二年封魏國長公主誤

少帝皇后張氏 案是書少帝紀及五代會要俱云天  
福八年追冊故妃張氏為皇后歐陽史缺載

富珠哩舊作傳住兒今改

舊五代史卷八十六攷證